

Pauru Nymerohpyry ropa sero Timoteu Neneryme

Sero pape tymerose Pauru a. Ritonôpo nymenekahpyryme kynexine ynororo imehnô amorepaneme. Āpuruhpyry tao kynexine Roma po. Pauru etapasasaka kynexine. Tynmerohpyry sero taropose eya Timoteu neneryme. Pauru maro toytose Timoteu tuhke pata tō poro. Imeīpo Jezu poetory amorepaneme toehse ynororo Epezu po.

Tynmerohpyryae Timoteu zurūko toorikyry poko. “Oserehpyra ase jorikyry poko Ritonôpo poko jorikyry zuno pyra jexiryke,” āko mana.

“Imeīpo tuhkākō Jezu poetory poenohnōko repe. Yrome Ritonôpo osenetupuhthō sã pyra osenetupuhnōko mã toto. Zae Ritonôpo ehtoh sã pyra roropa mã toto,” āko mana. “Naeroro yronymryme erohko Ritonôpo nyrohmanohpohpyry poko, imehnô Ritonôpo poetoryme ehtohme,” āko mana.

1 ¹Ywy ase Pauru Jezu Kyrixtu nenyokyhpyry. Pake ynara tykase Ritonôpo, “Kure rokē oritorỹko ase, jũme orihpyra oehtohkōme Jezu Kyrixtu maro,” tykase ynororo pake. Morara exiryke tonyohse ywy imehnô amorepatohme.

²Ynmerohpyry moro oneneryme Timoteu. Umūkuru kurāme mase Jezu Kyrixtu enetuputyryke oya oesēme.

Ynara āko ase Kumykomo a Ritonôpo a, “Kure rokē Timoteu tyriko, ipyno ke exiko, torētyke pyra tyriko,” āko ase. Morara āko ase roropa Kuesēkomo a, Jezu Kyrixtu a.

Kure mase Ritonôpo, katopōpyry

³Kokoro rokē oturūko ase opoko Ritonôpo netaryme. Ynara āko ase, “Kure mase Papa, Timoteu pyno oexiryke,” āko ase koko, saereme, enara. Ritonôpo poko ase. Yyrypyry poko pyra ase, tuaro ase. Tam tō tyrypyrykō poko pyra toh kynexine tuaro toexirykōke. Mokaro ehtopōpyry sã ase.

⁴Wenikehpyra jexiryke oxitatopōpyry poko, omuhpe oehtopōpyry poko roropa, oenery se ropa ase ipunaka, tãkye nymyry jehtohme. ⁵Jezu enetupuhnōko mase oesēme nymyry. Osenekunohpyra mase. Moro waro ase. Osemazuhme onoty a, Roiti a Jezu tonetupuhse. Asa a roropa tonetupuhse, Eunixi a. Seromaroro oya tonetupuhse rahkene. ⁶Morara exiryke pape merōko ase oneneryme wenikehpyra oehtohme, mãsa rokē

pyra oehtohme, imehnõ amorepary poko. Ouhpona jemary tyrise ahtao, Ritonõpo a Tuzenu tokarose oya imehnõ amorepatohme oya. ⁷Tuzenu ekarone kyya xine, oserehpyra kuehtohkõme, orẽpyra kuehtohkõme, imehnõ pyno kuehtohkõme, zae ehtoh riry waro kuehtohkõme, enara.

⁸Morara exiryke ehxiropyra exiko õtururuhtao imehnõ maro Jezu poko, Kuesẽkõ poko. Ehxiropyra exiko roropa ypoko. Jezu poetoryme jexiryke japuruase toto. Ysaaro ke exiko. Ynara kaxiko, “Jezu poko imehnõ amorepary se ase. Imehnomo a jutuarimaporyhtao eanahtõko ase,” kaxiko. Mame otuarimaporyhtao Ritonõpo ãkorehmãko mana eanahtotohme oya. ⁹Kukurãkatone. Kueahmatone roropa typoetoryme kuehtohkõme. Kynyrihpyrykõ kurã pokoino pyra, typoe rokẽ kueahmatone kure kyrirykõ se toexiryke. Toenupunase kypoko xine toexiryke Tumũkuru Jezu Kyrixtu enehpory se kynexine kukurãkanekõme, moinoro sero nono onyripyra ro tahtao. ¹⁰Seromaroro Ritonõpo kure toexiry tonepose kyya xine kukurãkanekõ oepiryke, Jezu Kyrixtu oepiryke. Kuorikyrykõ tonahkapose Jezu a, jũme orihpyra kuehtohkõme, enetuputyryhtao kyya xine. Moro poko tuaro systatose Jezu enetuputyryke kyya xine.

¹¹Imehnomo a roropa Jezu enetupuhpotohme tymenekase ywy Ritonõpo a, ipoko toto zurutohme. Ritonõpo nenyokyhpyryme roropa ase, imehnõ amorepatohme, juteutõkara roropa amorepatohme. ¹²Morara exiryke etuarimãko ase. Yrome ase ehxiropyra, Jezu waro jexiryke. Ukurãkaneme enetupuhne. “Jesẽme mase,” ake eya. Morara karyke ya osekarone eya ipunaka ipoetoryme jehtohme. Jewomaneme mana tooepyry ropa ponãmero kapu ae. Moro waro ase. ¹³Ritonõpo omiry ekaroryhtao ya otato mexiase. Zae rokẽ oturuase oya. Moro omipona rokẽ exiko imehnõ amorepatohme oya ysaaro. Jezu enetupuhneme oexiryke aomipona rokẽ exiko. Imehnõ pyno ke exiko. Morara sehtone Jezu Kyrixtu poetoryme kuexirykõke. ¹⁴Ritonõpo a tõmiry tokarose oya, otato oehtohme, etyorõmapopyra imehnomo a oehtohme, zae rokẽ imehnõ amorepatohme oya. Ritonõpo omiry poko awahtao Zuzenu ãkorehmãko mana. Kukurohtao xine mana Ritonõpo zuzenu.

¹⁵Mokaro Aziapõkõ urumekase ropa. Toto a urumekary waro mase, Pixeru, Emohxine, imehnõ maro urumekahpõkõ mokaro. ¹⁶Yrome Onexiporu jakorehmane itamurume. Morara exiryke ynara ãko ase Ritonõpo a, “Onexiporu tõ pyno exiko,” ãko ase, jakorehmaneme aexiryke. Ehxiropyra roropa monexiã ymyhtoh poko. ¹⁷Roma pona tooehse tahtao jupihpõ pohtoh rokẽ kara mokyro, jenery ropa ponãmero. ¹⁸Morara exiryke ynara ãko ase Ritonõpo a, “Onexiporu pyno exiko yna Esẽ oepiry ropahtao kapu ae,” ãko ase, takorehmase eya jexiryke Epezu po jahtao. Moro waro mase.

Soutatu sã Kuesẽkõ omipona kuexirykõ poko

2 ¹Morara exiryke aimo orẽpyra exiko. Jezu Kyrixtu ãkorehmãko mana, kypyno xine toexiryke. ²Ynekarohpyry oya Jezu poko metase imehnõ netaryme. Tuhkãkõ netaryme ynekarohpyry metase. Moro

ynekarohpyry ekaroko ropa orutua komo a, Ritonõpo omipona exiketomo a, imehnõ amorepananõme toto ehtohme.

³Oseanahtoko otuarimaporyhtao imehnomo a ysaaro, soutatu saaro roropa, Jezu Kyrixtu poetoryme oexiryke. ⁴Otuotoh konõto ahtao, soutatu tõ xiaksiake ytopyra, emero irumekāko tosēkõ omipona rokē toehtohkõme. Mokaro saaro kymarokomo. Torētyke pyra sehtone tineru apoiry poko, mōkomo apoiry poko roropa, Kuesēkõ omipona rokē kuehtohkõme tākye aehtohme kypoko xine. ⁵Morararo orutua kō atatapoiiryhtao imehxo exikety waro ehtohme, tosēkõ omipona rokē ahtao, “Imehxo mokyro mana,” āko mā toto ipoko. Tosēkõ omipona pyra ahtao, “Imehxo mokyro,” kara mā toto ipoko. ⁶Kure tutupi poko erohkety osemazuhme t̄kyryry epery enahnōko, tarykase eya exiryke. Imeīpo t̄kyryry ekamōko mana imehnomo a. ⁷Moro poko enetupuhko, ynmerohpyry poko. Moraramē Kuesēkõ otuarōtanohnōko mā rahkene, moro poko oepohnopyryhtao.

⁸Wenikehpyra ke exiko Jezu Kyrixtu poko. Mokyro rokē tōsemākapose ropa aorihxīpo. Tawi ekepyry par̄pyryme mana. Morara āko ase Jezu poko imehnõ amoreparyhtao. ⁹Moro pokoino etuarimāko ase. Jezu omiry ekaroryke ya pop̄y s̄a tōmapose ywy āpuruhpyry taka. Yrome Ritonōpo omiry anapurupyra mā toto. ¹⁰Morara exiryke eanahtōko rokē ase. Utuarimaporyhtao eanahtōko ase, Ritonōpo nymenekatyā kurākatohme, kys̄a toto ehtohme. Kukurākator̄yko Ritonōpo mana Jezu Kyrixtu poetoryme kuexirykōke. Kure rokē exiko sytatose orihp̄yme. ¹¹Ynara katopōpyry kure,

“Imaro kuorikyrykohtao,
imaro orihp̄yme exiko sytatose.

¹²Imaro kuetuarimarykohtao,
tuisame exiko sytatose imaro.

Yrome, ‘Jezu waro pyra ase,’ karyhtao kyya xine,
‘Mose waro pyra ase,’ āko roropa Jezu mana kypoko xine.

¹³Ajohpe kuahtao xine,
ajohpe pyra ro Jezu mana, kiryhkanemero.

Ynara kara mana, ‘Moky saaro ajohpe exiko ase,’ kara Jezu,
ajohpākaramē aexiryke.”

“Kure mase ya,” āko Ritonōpo aomipona exiketomo a

¹⁴Moro katopōpyry kure. Jezu poetory tõ moro poko toto onuenikehkapopyra exiko. Amorepako toto. Ynara kaxiko eya xine Kuesēkõ netaryme, “Oseosezuhpyra ehtoko omi poko. Oseosezuhnohtao popyra mana. Imehnõ akorekehkāko rokē mana,” kaxiko eya xine. ¹⁵Akīme pyra erohko Ritonōpo omipona oehtohme, “Kure mase,” katohme Ritonōpo a oya. Azahkuru pyra exiko ehxiropyra oehtohme oerokuru poko. Zae rokē imehnõ amorepako Ritonōpo omiry poko. ¹⁶Ritonōpo waro pyra exiketō omiry poko pyra exiko, Ritonōpo zamaro pyra toto omiry exiryke.

Mokaro omiry etananõ mã iirypyrymehxo exiko toh mana. ¹⁷ Ahno pũ toeposohkase ahtao motapitõko mana jõtopyra exiryke. Moro saaro mokaro omiry, emãnõko mana imehnõ ryhmãko samo. Asakoro mokaro amorepananõ mana Imeneu, Piretu, enara. ¹⁸ Mokaro azahkuru mana. Ritonõpo omiry turumekase eya xine. Ynara ãko toh mã repe, “Aorihtyã tõsemãkakehse Ritonõpo a,” ãko toto, ajohpe rokene. Toitoine azahkuru exikety etaryke tyya xine, osenekunohnõko mã toto. Jezu omipona hkopyra exiko mã toto. ¹⁹ Yrome Ritonõpo nukurãkatyã onyryhmara mana. Ynara tymerose exiryke Ritonõpo omiryne, “Kuesẽkõ typotory to waro mana,” me tymerose. Ynara roropa tymerose, “Kuesẽkõ poetoryme kuahtao xine kyyrypyrykõ rumekãko sytatose,” me tymerose exiryke.

²⁰ Imehxo exiketõ tapyĩ tao oripo tõkehko nae. Typyne exikety nae, uuru risemy, parata risẽ roropa. Typyne pyra exiketõ nae roropa, wewe risemy te, orino apuhsẽ tõkehko, kurãkõ ãme nae, emero rokẽ ãme nae, enara. ²¹ Oripo saaro sytatose. Kyyrypyrykõ rumekaryhtao kyya xine, tukurikase roropa kuahtao xine oripo kurã sã sytatose, typyne exiketõ samo. Kyyrypyrykõ poko pyra exiko sytatose, Kuesẽkõ poetoryme. Kuesẽkõ omi poe kure rokẽ exiko sytatose. Kure tyriry poko rokene. ²² Nuasemãkõ otarãme tyrypyrykõ poko penetãko mã toto. Ipenetarykõ poko pyra exiko. Ynara rokẽ exiko, zae ehtoh poko rokẽ exiko, Jezu enetuputyry poko, imehnõ pyno oexiry poko, kure rokẽ oexiry poko, enara. Moro saaro Ritonõpo maro oturuketomo, kure rokẽ toexirykõ poko toto. Tyrypyry poko pyra toto ipunaka tukurohtao xine. ²³ Yrome imehnõ omiry ãkorehmara mana Ritonõpo onenetupuhpyra aexirykõke. Okynahtao oxiehno imehnõ riko aomirykõ mana. Morara exiryke toto omiry onetara exiko. ²⁴ Jezu poetoryme kuexirykõke oxiehno pyra sehtone. Imehno pyno sehtone. Samorepane toto tomeseke. Emỹpopyra roropa sehtone. ²⁵ Imehno amoreparyhtao kuomirykõ



(2TI 2.20)

omipona pyra toto ahtao toto pyno ro sehtone. Otarãme imeĩpo iirypyryme toexirykõ enetupuhnõko mã toto Ritonõpo poe. Otarãme tyrypyrykõ rumekãko ropa toto Jezu omipona toehtohkõme. ²⁶Otarãme eramãko ropa toh mana joroko tamuru winoino. Inapurutoh tae tütãko ropa toh mana. Otarãme omi kurã omipona pyra aehtyã ekurãkãko ropa toh mana Ritonõpo poe, enara.

Jezu oehsasaka ahtao

3 ¹Tuaro ehtoko, Jezu oehsasaka ahtao tuhke ehtomaketõ exĩko mana, Jezu omipona exiketõ poremakapory se exiketomo. ²Mokaro osepyno rokẽ exiketomo. Imehnõ mõkomory poko penetãko mã toto. Osenetaonohnõko rokẽ mã toto. Ritonõpo kerekeremãko mã toto, tumykõ omipona pyra exiketomo. Tỹkyryrykõ tokarose ahtao eya xine, “Kure mase,” kara mã toto, Ritonõpo omipona pyra roropa mã toto. ³Sekerereme pyra exiketõ mokaro, otupokapopyra exiketomo. Imehnõ kerekeremananomo ajoajohpãkomo, zehnotokomo, kurãkõ se pyra exiketomo. ⁴Tope tõ ewokananomo, osepyno pyra exiketomo, osenetaonohketomo, typenetatoh poko rokẽ exiketomo, Ritonõpo a tuaropyra exiketomo. ⁵“Ritonõpo poetoryme ynanase,” ãko toh mã repe. Yrome Ritonõpo jamitunuru ripory se pyra mã toto tukurohtaka xine. Naeroro mokaro maro pyra ehtoko isã oexirykõino. ⁶Toitoino mokaro zae pyra imehnõ amorepãko mã toto. Imehnõ tapyĩ takuroko omõnõko mã toto, nohpo to omipohtomase. “Jomipona awahtao xine, ytopyra matose apoto konõto htaka,” ãko toh mã repe. Mame ataomipohtomapõko mã toto. “Iirypyryme ase,” ãko rokẽ mã toto, yrome tyrypyry rumekary se pyra mã toto. ⁷Atamorepakehpyra toh mã repe. Yrome zae omi enetupuhsaromepyra mã toto. ⁸Pake Janexi tõ tõxienonohse Moeze maro, Janexi, Jãpyrexĩ. Enara toh kynexine. Zae Moeze omĩry kynexine. Yrome zae omi etary se pyra toh kynexine. Zae omi etapory se pyra roropa toh kynexine. Mokaro saaro serõkomo. Zae pyra imehnõ amorepãko mã toto zae omipona toexirykõ se pyra mã toto. Tukurohtao xine azahkuru rokẽ osenetupuhnõko mã toto. Jezu poetory poenohnõko rokẽ mã toto. Yrome Ritonõpo omipona pyra ekurehnõko mã toto. ⁹Myaro tokoro pyra mã toto. Azahkuru toto exiry enẽko imehnõ emero, pake Janexi tõ azahkuru ehtopõpyry samo Jãpyrexĩ maro.

Pauru namorepatopõpyry etyhyry

¹⁰Yrome ya imehnõ amorepatopõpyry waro toehse mase. Kure jehtopõpyry waro roropa mase. Ritonõpo omipona se jehtopõpyry waro mase, Ritonõpo enetupuhtopõpyry ya, sekerereme jehtopõpyry, imehnõ pyno jehtopõpyry, yryhmary eanahtotopõpyry ya, ¹¹vyhtomatopõpyry, enara. Toetuarimase ywv itamurume Ātiokia po jahtao, Ikoniu po, Rixityra po, enara. Jyhtomaryhtao, Ritonõpo ypynopyase. ¹²Morararo emero Jezu Kyrixtu omipona se exiketomo. Imaro se exiketõ osanumãko mã toto aomipona se toto exiryke. ¹³Yrome iirypyrymãkõ popyrahxo exĩko mana, onekunohtõkõ roropa. Imehnõ

enekunohnōko mǎ toto. Osenekunohpōko roropa joroko tamuru a toto. ¹⁴Yrome tyoro mase. Āmorepahpōkō waro mase, asa, onoty, ywy, enara. ¹⁵Opoetoaero kurā poko ātamorepahpyry mase. Pape kurāme exiryke kutuarōtanohtorỹko mana, Ritonōpo a typoetoryme kyrirykō poko, Jezu Kyrixtu tonetupuhse kyya xine ahtao. ¹⁶Tōmiry tymeropose urutōkomo a Ritonōpo zuzenu omi poe, zae kuamorepapatohkōme, iirypyrymākō mynyhmapotohme, azahkuru exiketō kurākatohme, kuamorepatohkōme kure ehtoh poko kuehtohkōme. ¹⁷Tōmiry tymeropose eya typoetory tō tuaro ehtohme tymōkomoke exiketō sǎ kuehtohkōme kure ehtoh poko zuaro kuehtohkōme imehnō akorehmary waro roropa kuehtohkōme.

4 ¹Jezu oehnōko mana kutuisarykomo. Toehse tahtao kurākō apiakāko mana popyno htae emero, aorihtyamo, orihpynomo, enara. Ynara oururu se ase Ritonōpo netaryme, Jezu Kyrixtu Kuesēkō netaryme roropa. Ynara āko ase oya, ²Ritonōpo omiry ekaroko imehnō netaryme. Ekurehpyra exiko. Jezu apoiry se toto ahtao, amorepako toto. Apoiry se hkopyra toto ahtao aomiry ekaroko rokē toto netaryme. Pohnō zuruko tyrypyrykō poko pyra toto ehtohme. Ākyemapoko toto. Amorepako toto Ritonōpo omiry poko. Penekehpyra ke exiko roropa toto amoreparý poko. ³Imeipo zae omi etary se pyra exiko mǎ toto sero nonopōkomo, typenetatohkō poko rokē toehtohkōme. Ajohpākō menekāko mǎ toto tamorepanekōme, tyrypyrykō poko rokē tamorepatohkōme. ⁴Zae omi rumekāko mǎ toto ajoajohpākō omiry rokē etatohme tyya xine. ⁵Naeroro mokaro sǎ pyra exiko. Tuaro exiko. Oetuarimaryhtao eanahtoko rokene. Imehnō zuruko Jezu Kyrixtu poko. Orēpyra exiko Ritonōpo omipona. Imehnō akorehmako roropa aomipona toto ehtohme.

⁶Okynahkopyra jorihtoh toehse nase. Yrome torētyke pyra ase jorikyry poko. ⁷⁻⁸Tururume ytoketō ahtao, toiro osemazuhme eporehkāko. Epehpyry apoiko mana, tosēkō omipona ahtao rokene, osema etyhpyry pona toeporehkase ahtao roropa. Mokaro sǎ ywy. Poremāpyra exiase. Yrohmanohpotopōpyry poko tōtyhkase ywy. Kuesēkō onenetupuhkehpyra ase. Naeroro Ritonōpo nekarory kurā jeraximāko mana, kure jehtopōpyry epehpyryme. Moro ekarōko mǎ Kuesēkō ya ekarotoh po toehse ahtao. Imehnomo a roropa, emero Kuesēkō pyno exiketomo a moro ekarōko roropa mana, aepyry ropa eraximananomo a.

Pauru nurutopōpyry

⁹Timoteu, axī sahxo ōpokonopyry aotyhkanohko, oehtohme xiaro ya. ¹⁰Turumekase Temaxi a jexiryke morara āko ase. Mōkomo poko typenetaryke toytose ynororo Tesaronika pona. Kyresēte toytose roropa Karaxia pona. Titu toytose Taumaxia pona, enara. ¹¹Ruka rokē taro nase ymaro. Maku menehtase amaro oehtozome, jakorehmaneme aehtohme taro. ¹²Tikiku aropone Epezu pona. ¹³Ooepyryhtao jupō enehko. Tyroa



(2TI 4.22)

po Kapo tapyĩ tão ynomoase. Moro enehko. Ypapẽ roropa enehko. Okyno pihpyry risẽ roropa enehko, imerohpyry. Moro se nymyry ase.

¹⁴Arexãtere mokyro metau poko erohkety. Popỹ mokyro, yhtomane. Apo Kuesẽkõ mokyro wãnohno iirypyryme aexirypo. ¹⁵Akorekehkatõ mokyro nexiase Ritonõpo omiry ekaroryhtao yna a. Tõsezusezuhse itamurume ynororo yna maro. Mokyro waro exiko oryhmariño roropa.

¹⁶Terekatu êpataka toehse jahtao josewomatoh myhe upiase. Urumekase toto emero porehme. Yrome ynara ãko ase Ritonõpo a ipoko xine, “Papa, iirypyrykõ ikorokako ropa,” ãko ase. ¹⁷Mokaro urumekase repe, yrome Kuesẽkõ ymaro monexiano. Yjamihtanopyase Jezu poko juteutõkara zurutohme. Ypyno Kuesẽkõ exiryke eatãpyra toh kynexine, rião pãkomo. ¹⁸Kuesẽkõ ypynohnõko mana yryhmarihtao pohno mo a. Mame orẽpyra tosaka jarõko mana. Moero mã emero esẽme mã ynororo. “Kure Ritonõpo mana, kakehpyra sehtone.” Morara ahtao kure mana.

“Murutase toto,” katopõpyry

¹⁹Murutase toto Pirixira, Akira, Onexiporu tõi roropa, enara. ²⁰“Pauru opyno xine,” kaxiko eya xine. Eraxitu tõesarise Korĩto po, Tyropimu ynomoase Miretu po, kure pyra exiryke. ²¹Axĩ sahxo moehtase konopotara ro ahtao.

“Kuurupotase Timoteu a,” tykase Eupuru. Purutẽte, Rino, Kyrautia emero Jezu poetory tõi maro. “Opyno ynanase, Timoteu,” ãko toh nase.

²²Ynara ãko ase Kuesẽkomo a Jezu Kyrixto a, “Timoteu maro exiko. Ipyno exiko,” ãko ase. Enara rokene.